

I. TITULUA

IZENA, LURRALDEA, EGOITZA ETA HELBURUA

1. artikulua: Eraketa, izena eta iraupena

Euskampus Fundazioa irabazi asmorik gabeko erakundea da eta interes orokorreko helburuei atxikita dauka bere ondarea, epe mugarik gabe.


Euskampus Fundazioak bere kideen borondatea eta Estatutu hauek ditu arau, betiere, oinarri hartuta ekainaren 2ko 9/2016 Legeak, Euskal Autonomia Erkidegoko Fundazioei buruzkoak, zehaztutakoa, hori garatzeko lege xedapenak eta indarreko arauak.

2. artikulua: Araubidea, nortasun juridikoa eta gaitasun juridikoa

Eratze eskritura Fundazioen Erregistroan sartzen duenetik fundazioak berezko nortasun juridikoa izango du eta gaitasun juridiko osoa jarduteko, muga bakarra izanik sortzaileek eratze ekitaldian adierazitako borondatean ezarritakoak eta estatutu hauetan nahiz kasuan aplikatu beharreko legeetan (bereziki ekainaren 2ko 9/2016 Legeak, Euskal Autonomia Erkidegoko Fundazioei buruzkoan) zehaztutakoak.

Beraz -Babesletzari egin beharreko komunikazioak eginda edo eskatu beharreko baimenak eskatuta- fundazioak bere helburua betetzeko ekintza guztiak burutu ahal izango ditu Kode Zibileko 38. artikuluan jasotakoarekin bat etorrira. Fundazioak egin ahal izango ditu:

- a) Bere helburuak betetzeari begira, era guztietako jarduera ekonomikoak garatu, edo baliabideak eskuratu.
- b) Era guztietako ondasunak eta eskubideak eskuratu, besterendu eta eduki, edozein tituluz, eta era guztietako egintzak eta kontratuak egin.
- c) Era guztietako akzioak baliatu, betiere legediari edo bere estatutuei jarraituz.



3. artikulua: Lurraldeia

Fundazioak nagusiki Euskal Herrian jardungo du, nahiz eta ez den horretara mugatuko. Izan ere, fundazioak beste eremu geografiko batzuetan ere jardun ahal izango du bere helburuak betetzeko.

4. artikulua: Egoitza

Fundazioaren egoitza Universidad del País Vasco/Euskal Herriko Unibertsitateko Errektoregoko eraikinean egongo da, Bizkaiko Campusean (Sarriena auzoa z/g, 48940 Leioa, Bizkaia). Nahi izanez gero, Patronatuak egoitza aldatzea erabaki ahal izango du, eta horren berri eman beharko dio Fundazioen Erregistroari. Era berean, Patronatuak erabakiko du fundazioak zein establezimendu, ordezkaritza edo bulego izango dituen, halakorik eduki behar badu, bere helburuak betetzean sortzen zaizkion premien arabera.

5. artikulua: Iraupena

Fundazioa irauteko eratu da, eta sortze eskritura egiten den egunean hasiko da jardunean, eta hortik aurrera fundazioa inskribatzeko ekintza guztiak burutu ahal izango ditu, bai eta bere ondarea zaintzeko ezinbestekoak direnak ere, eta fundazioarentzako kalterik gabe atzeratu ezin diren ekintzak. Ekintza guzti horiek bere gain hartuko ditu automatikoki fundazioak erregistroan inskribatzen denean, hots, benetako nortasun juridikoa hartzen duenean.

6. artikulua: Fundazioaren helburuak

Fundazioaren helburua da Euskal Herriaren transformazio sozial, ekonomiko eta kulturalaren bultzagarria izatea, jakintzaren gizartean nazioarteko abangoardia izateko. Helburu hori betetzeko, honako hauek egingo ditu, besteak beste:

- Nazioartean izen handia izango duen prestakuntza, ikerketa, transferentzia eta berrikuntza gune bat eratzen laguntzea.
- Nazioarteko campus akademikoa sendotzea, kanpoan proiektatzeko kalitatezko goi mailako hezkuntza publikoaren eredu bat, jakintzaren gizartean txertatua dagoena.
- Lankidetzeta sustatu eta bideratzea Euskal Herriko agenteen artean (zientzia, teknologia eta berrikuntzarako euskal sareko entitateak, enpresak, gizarte eragileak eta abar), eta Euskal Herriko eta nazioarteko eragileen artean, goi mailako prestakuntzaren eremuan, ikerketan eta jakintzaren baliarazpenean eta transferentzian, hori guztia gizarte osoaren onurarako eta nazioarteko testuinguruan kokaturik
- Euskal Herriaren izena nazioartean zabaltzea zientzia, teknologia, berrikuntza, sormen eta talentuaren gune gisa, eta nazioarteko entitateekin lankidetzeta egonkorerrako

hitzarmenak egiten ahalegintzea; pertsonen mugikortasuna sustatzea, eta prestakuntza, ikerketa eta berrikuntzarako programak elkarlanean sortzea.

- Munduko edozein bazterretatik talentuak erakarri eta haien leialtasuna lortzea, behar diren baliabideak jarriz pertsona horiei harrera egiteko, haien integrazioa eta jarduna errazteko.
- Zientzia, teknologia, arteak eta giza zientziak ikasi, ikertu eta gizartean zabaltzeko era guztietako jarduerak sustatu eta hedatzea, bakarka edo beste erakunde batzuekiko lankidetzan.
- Laguntzea Euskal Herriko Unibertsitateari nazioarteko bikaintasun campus gisa sendotzen, bere inguruko gainerako erakunde publiko eta pribatuekin lotura estua duen campusa, herritarrekin konprometituta dagoena, eta modu aktiboan lan egiten duena lurraldea garatzeko eta irtenbideak bilatzeko Euskal Herriak aurrean dituen erronketarako, hala arlo sozialean eta kulturean nola ingurumenaren arloan.
- Bultzatzea era guztietako ekimenak gizartearen eta fundazioko entitateen arteko lotura sendotzeko.
- Modu aktiboan lan egitea euskal hizkuntza eta kultura gara daitezen eta gizartean oihartzuna izan dezaten, fundazioaren helburuen arabera.

Aurreko atalean azaldutako xedek betetzeko, fundazioak era guztietako ekintzak burutu ahal izango ditu, edo helburu horiek betetzeko baliabideak lortzeko ekintzak.

Euskampus Fundazioa, UPV/EHUren bultzadarekin, ardatz izango da unibertsitatea partaide dela jakintzaren arlo guztietan jarduten duten erakunde guztientzat.


7. artikulua: Onuradunak

Patronatuak fundazioaren baliabideak haren jatorrizko helburuen alde jarriko ditu, Euskal Autonomia Erkidegoko Fundazioei buruzko ekainaren 2ko 9/2016 Legeko 29. artikulua betez.

Fundazioaren onuradun izango dira fundazioaren jardueren hartzailerik diren pertsona fisiko eta juridiko guztiak.

Fundazioak, interes orokorreko bere helburuen barruan, objektibotasun eta inpartzialtasunez jokatu beharko du bere onuradunak zehaztean, inongo bazterkeriarik gabe. Fundazioaren onuradun izango dira fundazioarekin, haren helburu orokorren barruan, lankidetzan jardun nahi duten pertsona fisiko edo juridiko, publiko edo pribatuak.

Edozelan ere, onuradunak izendatzean, Patronatuak honako irizpideak izango ditu



kontuan:

- a) Fundazioen jarduerak pertsona fisikoek nahiz juridikoek osatutako kolektibo generikoei ekarri behar die onura. Halakotzat hartuko dira enpresa bateko edo batzuetako langileek eta horien senitartekoei osatutako kolektiboak. Nolanahi ere, onuradunen kolektiboa aukeratzeko irizpideek objektiboak eta inpartzialak behar dute izan.
- b) Ezin izango da fundaziorik eratu, helburu nagusia bada prestazioak eskaintzea fundatzaileari edo fundatzaileei edo patronatuko kideei, haien ezkontideei edo haiekin antzeko harreman afektiboa dutenei edo haien laugarren gradura bitarteko ahaideei -laugarrena barne-; ez eta prestazio horiek interes orokorreko helburuak ez dituzten pertsona juridiko bereizientzat badira.
- c) Inork ere ezin izango du alegatu, ez bakarka, ez taldeka, fundazioaren edo Patronatuaren aurrean, onura horiek eman baino lehen baliatzeko aukera, ezta pertsona jakin batzuei emanarazi ere.

8. artikulua: Publizitatea

Balitzko interesdun edo onuradun guztiek izan dezaten fundazioaren jardunaren berri, Patronatuak behar bezala zabalduko ditu haren helburu eta jarduerak.

II. TITULUA

FUNDAZIOAREN ORGANOAK

9. artikulua: Fundazioaren organoak

1. Fundazioaren organoak dira, besteak beste, Patronatua eta Batzorde Eragilea.
2. Fundazioaren gobernu edo ordezkartzarako organoa Patronatua da.
3. Aurrekoa gorabehera, Patronatuak batzorde ordezkoak edo aholku batzordeak izendatu ahal izango ditu.

I. ATALA

PATRONATUA

10. artikulua: Patronatua

10.1 Patronatua

Patronatua organo gorena da fundazioaren gobernu, kudeaketa eta ordezkaritzarako. Berak dauzka fundazioaren helburuak betetzeko ahalmenik handienak.

10.2 Osaera eta iraupena

Patronatua gutxienez 8 lagunek eta gehienez 42 lagunek osatuko dute.

Patronatua osatzen duten pertsonak fisikoak edo juridikoak izan daitezke. Patronatuko kide izateko, pertsona fisikoek jarduteko gaitasun osoa izan beharko dute, eta ezin izango dira egon ezgaiturik kargu publikoak betetzeko. Pertsona juridikoak diren patronoek pertsona fisiko bat izendatu beharko dute beren ordezkaria izateko Patronatuan.

Patronoak izan daitezke berezkoak, izendapenezkoak edo hautapenezkoak:

Berezko patronoak: fundazioaren sortzaileek fundazioa eratzeko eskrituran horretarako izendatutakoak dira.

Honako hauek dira berezko kideak:

- Euskal Herriko Unibertsitateko edo bere ordezko entitateko errektorea eta ikerketa arloko eskumenak dituen errektoreordea.
- Tecnalia Fundazioko edo bere ordezko entitateko lehendakaria, non eta ez dion zeregin hori eskuordetzen Tecnalia Fundazioko zuzendari nagusiari.
- Donostia International Physics Center fundazioko edo bere ordezko entitateko, lehendakaria, non eta ez dion zeregin hori eskuordetzen Donostia International Physics Center fundazioko zuzendari nagusiari.

Izendapenezko patronoak: hauen izendapena aukeratzen dituenaren menpe egongo da. Honela aukeratuko dira:

- Euskal Herriko Unibertsitateko edo bere ordezko entitateko errektoreak bi aukeratuko ditu. Pertsona fisikoak edo juridikoak izan daitezke.



- Tecnalia Fundazioko edo bere ordezko entitateko lehendakariak bat aukeratuko du. Pertsona fisikoa edo juridikoa izan daiteke.
- Donostia International Physics Centerreko edo bere ordezko entitateko lehendakariak bat aukeratuko du. Pertsona fisikoa edo juridikoa izan daiteke.

Izendapenezko patronoak mugarik gabe egongo dira karguan, baina aukeratu dituztenek gura dutenean kendu ahal izango dituzte kargutik. Edozelan ere, izendapenezko patrono bat kargutik kentzearekin batera, ordezkoa aukeratu beharko dute.

Hautapenezko patronoak: Patronatuak patronatua osatzeko izendatutako kideak dira, eta dira ez berezkoak ez izendapenezkoak. Pertsona fisikoak edo juridikoak izan daitezke.

Hautapenezko patronoek bost (5) urteko agintaldia izango dute, eta behin baino gehiagotan izan ahalko dira hautatuak.

Ohorezko patronoak: fundazioaren helburuen alde egindako aparteko ekarpenengatik, Patronatuak izendapen hori egiten dien pertsonak edo entitateak dira.

Ohorezko patronoek aholku baino ez dute emango fundazioko Patronatuak iritzia eskatzen dien gaitan. Halakoetan, ohorezko patronoek hitza izango dute, baina ez botorik, eta haien presentzia ez da kontuan hartuko bilerak egiteko quorumari dagokionez edo erabakiak hartzeko gehiengoei dagokienez.

Patronatuak, bere lehendakariak proposaturik, ohorezko lehendakari edo lehendakariordeak izendatu ahal izango ditu, bai eta fundazioaren ongileak ere.

10.3 Patronoak izendatzea eta haien hutsuneak betetzea

Lehen patronatua fundazioaren sortzaileek izendatuko dute, fundazioa eratzeko eskrituran.

Aurreko 10.2 artikuluan fundazioaren sortzaileei aitortutako eskubidea eragotzi barik, hautapenezko patronoak izendatu behar direnean, dela Patronatua handitu behar delako, edo patronoen hutsuneak bete behar direlako, Patronatuak berak izendatuko ditu, bertaratutako (zuzenean edo ordezkarien bidez bertaratutako) kide guztien gehiengo osoak hartutako erabakiaren bidez. Edozelan ere, ezinbestekoa izango da bertaratutako berezko patronoen (bertan dauden edo ordezkarien bidez bertaratuen) gehiengo soilak aldeko botoa ematea.

Patrono izendatzen diren pertsonak kargua onartu beharko dute modu agerian, legeko 16. artikuluan jasotako formuletakoren bat erabiliz. Onarpena Fundazioen Erregistroan sartu beharko da.

Fundazioa sortu ondoren bertan sartzen diren patronoek fundazioari eman ahalko diote fundazioak une bakoitzean zehaztuko duen zenbatekoa; ekarpen hori ez da behin betikoa izango.

Izendapenezko patronoek kargua uzten dutenean heriotza, ezintasuna, ezgaitzea, heriotza adierazpena, kanporatze edo bateraezintasuna, ukoa, kargutik kentzea edo beste edozein arrazoi dela eta, kargua utzi duena izendatu zuen patronoak beteko du haren hutsunea, estatutu hauetako 10.2 artikuluari jarraiki. Edozelan ere, kargua ezin izango da hutsik egon sei hilabete baino gehiago.

Patronatuaren erabakiek balioa izan dezaten, Patronatuak izan beharko ditu estatutu hauetako 10.2 artikuluan zehaztutako gutxieneko kide kopurua.

Aginte judizialak uste badu patronoek ez dutela kargua bete legean eskatzen den arduraz, eginkizunez gabetu ahal izango ditu, haien kontra erantzukizuna eskatzeko akzioa abiaraziz.

Patronatuko kide diren pertsona juridikoek pertsona fisiko bat aukeratu beharko dute bere ordezkaria izateko. Patronatuko kidea kargu publiko edo pribatu baten jabe denean, pertsona horrek beste bat izendatu ahal izango du bere ordezkari jardun dezan.

Gobernu organoko kideen ordezkapena, kargutik kentzea eta eginkizunez gabetzea Fundazioen Erregistroan jasoko da.

11. artikulua: Patronatuko karguak

11.1 Lehendakaria

Patronatuko lehendakaria da fundazioaren ordezkari gorena. Gainera, fundazioei buruzko arautegian aitortzen zaizkion eginkizunak ditu, eta, zehazki, honako hauek:

- a) Patronatuaren bileretarako deiak egitea.
- b) Egoki deritzen pertsonak gonbidatzea bileretara.
- c) Bileretan buru egon eta eztabaidak gidatzea, hitza emanez edo kenduz, eta bozketetan berdinketa dagoenean gaia ebatziz kalitateko botoaren bidez.
- d) Erabakiak betetzea edo betetzeko agindua ematea, horretarako behar diren ekintzak burutuz eta dokumentu publiko nahiz pribatuak sinatuz.



- e) Fundazioaren ordezkari instituzionala izatea denetariko pertsona, entitate, agintari, organismo eta administrazio publikoen aurrean.
- f) Oro har, Fundazioa zuzentzea, eta zeregin horretan egoki deritzen neurriak hartzea, behar diren ekintzak burutuz eta dokumentu publiko nahiz pribatuak sinatuz.
- g) Estatutu hauetan aitortzen zaion beste edozein ahalmen.

Fundazioko lehendakaria Euskal Herriko Unibertsitateko errektoreak izango du beti, eta berezko kargua izango da.

11.2 Lehendakariordea

Lehendakariordea fundazioko kideek izendatuko dute, edo, bestela, Patronatuko kideek hautatuko dute beren baitako kideen artetik. Lehendakariorde izateko, beharrezkoa izango da hautagaiak bertaratutako patronoen (bertan dauden edo ordezkarien bidez bertaratutako) gehiengo osoaren aldeko botoak izatea, eta ezinbestekoa izango du berezko patronoen (bertan dauden edo ordezkarien bidez bertaratutako) gehiengo soilak haren alde bozkatzea.

Lehendakariaren kargua hutsik dagoenean edo lehendakaria kanpoan edo gaixorik dagoenean lehendakariordeak beteko ditu haren zereginak eta Patronatuak ematen dizkion guztiak. Lehendakariordea ez badago, Patronatuko kiderik zaharrenak beteko ditu eginkizun horiek guztiak.

Lehendakariak botoa eskuordetuko balu, botoa eskuordetu dion pertsonak lehendakariaren zereginak beteko ditu eta berak izango du kalitateko botoa berdinketa egonez gero.

11.3 Idazkaria

Idazkaria Fundazioko patronoa izan daiteke edo ez. Patronoa ez bada, hitza izango du, baina botorik ez. Lehen idazkaria fundazioko kideek izendatuko dute, edo, bestela, Patronatuak hautatuko du. Idazkari izateko, beharrezkoa izango da hautagaiak bertaratutako patronoen (bertan dauden edo ordezkarien bidez bertaratutako) gehiengo osoaren aldeko botoak izatea, eta betiere berezko patronoen (bertan dauden edo ordezkarien bidez bertaratutako) gehiengo soilaren aldeko botoak.

Idazkariak fundazioaren dokumentazioa zainduko du, Patronatuko bileren aktak jasoko ditu eta haien ziurtagiriak egingo ditu lehendakariaren edo haren eginkizunak betetzen dagoen pertsonaren onespenerekin. Gainera, estatutu hauetan idazkariarentzat aurreikusitako gainerako eginkizunak eta beren-beregi eskuordetzen zaizkionak beteko ditu.

Idazkariak, nahi izanez gero, idazkariorde bat izendatu ahal izango du berari laguntzeko eta bera ordezkatzeko. Idazkariordeak idazkariaren zereginak beteko ditu idazkari kargua hutsik dagoenean edo idazkaria kanpoan edo gaixorik dagoenean. Idazkariorderik ez badago, eta idazkaria gaixorik edo kanpoan badago, edo idazkari kargua hutsik badago, Patronatuko pertsonarik gazteenak beteko ditu haren zereginak, edo Patronatuak horretarako izendatzen duen pertsonak.

11.4 Diruzaina

Nahi izanez gero, Patronatuak diruzaina izendatu ahal izango du, bere baitako kideen artetik edo ez, eta Patronatuak ematen dizkion eginkizunak izango ditu.

Honako eginkizun hauek izan ditzake:

- 1.- Fundazioaren dirua bildu eta zaintzea.
- 2.- Sarrerren eta gastuen balantzea aurkeztu eta sinatzea.
- 3.- Inbentarioen, kontuen eta aurrekontuen liburuak eta kontabilitateko egunkaria eramatea.

12. artikulua: Doakotasuna

Patronoek ez dute dirurik jasoko kargua betetzeagatik. Hala ere, karguak sortzen dizkien gastuak ordainduko zaizkie, behar bezala justifikatuz gero.

Patronatuko kideek ordezkaritza beste kide bati eskuordetu ahal izango diote. Ordezkaritza eskuordetza idatziz emango zaio ordezkoari bilera bakoitzerako. Inor ezin izango da izan patrono baten baino gehiagoren ordezkari.

13. artikulua: Barne funtzionamendua

Patronatuak gutxienez 2 bilera egingo ditu urtean. Bat, urteko lehen sei hilabeteen barruan, aurreko ekitaldiko aurrekontuaren kitapena, inbentarioa, jardueren memoria eta aurreko ekitaldiko egoeraren balantzea eta emaitzen kontua onartzeko, estatutu hauetan zehaztutako baldintzetan. Beste bilera, urte bakoitzeko laugarren hiruhilekoan, hurrengo ekitaldiko gastuen eta sarrerren aurrekontua onartzeko.

Patronatuak ezohiko bilera egingo du bere kideen herenak hala eskatzen diotenean edo lehendakariak hala erabakitzen duenean.



14. artikulua: Deialdia

Patronatuko lehendakariak egingo du Patronatua biltzeko deialdia, Patronatuko kide bakoitzari jakinarazpen idatzia bidaliz bileraren eguna baino hamabost egun lehenago.

Deialdian bileraren lekua, gela, eguna eta ordua zehaztu beharko dira, eta lehendakariak erabakitako aztergaien zerrenda.

Patronatuko kideen heren batek eskatuta ezohiko bilerarik egingo balitz, aztergaien zerrendan nahitaez sartu beharko dira haiek proposatutako aztergaiak.

15. artikulua: Patronatuaren eraketa eta deliberazioak

Patronatua balioz eratzeko kideen erdiak eta bat gehiago bildu beharko dira.

Erabakiak bertaratuen (zuzenean edo ordezkarien bidez bertaratuen) aldeko botoen gehiengo soilaz hartuko dira. Lehendakariak kalitateko botoa izango du berdinketa gertatuz gero.

Aurreko atalean esandakoa gorabehera, estatutuak aldatzeko, fundazioa beste erakunde batekin batzeko, fundazioa desegiteko eta patronoak izendatzeko, beharrezkoa izango da bertaratutako kide guztien (bertan dauden edo ordezkarien bidez bertaratutako) gehiengo osoak aldeko botoa ematea, eta betiere ezinbestekoa izango da berezko patronoen (bertan dauden edo ordezkarien bidez bertaratutako) gehiengo soilak aldeko botoa ematea.

Patronatuaren bilerak bideokonferentzia bidez edo komunikaziorako beste baliabide batzuen bitartez egin ahal izango dira, betiere bermatzen bada bileran zeinek parte hartzen duten identifikatzea, komunikazioa jarraitua izango dela, kideek eztabaidetan parte hartu ahal izango dutela eta botoa eman ahal izango dutela. Edonola ere, bilera lehendakaria dagoen lekuan egin dela ulertzen da.

Salbuespen gisa, bilerarik egin gabe ere hartu ahal izango ditu erabakiak patronatuak, betiere informazio eta boto eskubideak bermatuta badaude, botoa jaso dela nonbait agerrarazten bada eta haren autentikotasuna bermatzen bada. Erabakia pertsona juridikoaren helbidean eta eman diren baliozko botoetatik azkena jasotako datan hartu dela ulertuko da.

16. artikulua: Patronatuaren eskumenak

Patronatuak eskumena dauka fundazioaren gobernuari dagokion guztian, eta, bereziki honako eginkizun hauek betetzeko, Patronatuaren ahalmen eskusibo eta finkoak baitira:

- a) Inbentarioa, egoeraren balantzea, emaitzen kontua, aurreko ekitaldiko memoria eta aldi horretako sarrera eta gastuen aurrekontuaren kitapena onartzea.
- b) Hurrengo ekitaldiko sarrera eta gastuen aurrekontua, haien azalpen txostena eta eginkizunen programa onartzea.
- c) Estatutuak aldatzeko, eta fundazioa beste erakunde batekin batzeko, fundazioa desegiteko eta kitapena egiteko erabakiak hartzea.
- d) Batzorde Eragileko kideak izendatzea.
- e) Babesletzaren baimena edo hura jakitun jartzea eskatzen duten edo fundazioaren ohiko gestiotik haragokoak diren erabakiak hartzea.

Fundazioaren helburuak errazago betetze aldera, Patronatuak Batzorde Eragileari eskuordetu ahal izango dizkio modu eskusibo eta etengabe ez dituen ahalmen guztiak. Beraz, Batzorde Eragilea Patronatuaren ordezkoa izango da estatutu hauetan eta aplikatu beharreko gainerako arauetan zehaztutako baldintzetan.

II. ATALA


BATZORDE ERAGILEA

17. artikulua: Batzorde Eragilea

Batzorde Eragilea Patronatuaren ordezeko organo iraunkorra da. Gutxienez bost pertsonak osatuko dute, eta gehienez zortzik.

Edozelan ere, Batzorde Eragileak bost kide hauek izango ditu:

- Euskal Herriko Unibertsitateko edo haren ordezeko entitateko errektorea.
- Tecnalia Fundazioko edo haren ordezeko entitateko lehendakaria.
- Donostia International Physics Centerreko edo haren ordezeko entitateko lehendakaria.
- Euskal Herriko Unibertsitateko edo bere ordezeko entitateko errektoreak, patronatuko kideen artean, aukeratutako bi kide. Pertsona fisikoak edo juridikoak izan daitezke. Bi



kide horiek mugarik gabe izango dira Batzorde Eragileko kide, baina Euskal Herriko Unibertsitateko errektoreak edozein unetan kendu ahal izango ditu kargutik. Edozelan ere, izendapenezko patrono bat kargutik kentzearekin batera, ordezkoa izendatu beharko du.

Batzorde Eragileko gainontzeko hiru kideak izendatzeko patronatuko bertaratutako (bertan dauden edo ordezkarien bidez bertaratutako) gehiengo soilak beharko da.

18. artikulua. Karguak

Patronatuko lehendakaria izango da Batzorde Eragileko lehendakaria. Bozketetan berdinketa gertatzen denean pertsona horrek kalitateko botoa izango du.

Fundazioko Batzorde Eragileko idazkaria kidea izan daiteke edo ez. Idazkariak beteko ditu Batzorde Eragileak edo haren lehendakariak eskuordetzen dizkioten zereginak, akta liburuez arduratuko da eta akten ziurtagiriak egingo ditu, batzordeko lehendakariaren edo haren ordezkoaren onespenerekin.

19. artikulua. Deialdiak, bilerak eta deliberazioak

Batzorde Eragilea bilduko da lehendakariak egoki deritzonean, baina gutxienez urtean bitan, edo batzordeko bi kidek gutxienez idatziz hala eskatzen dutenean.

Deialdian aztergaien zerrenda, eta bilerako lekua, eguna eta ordua zehaztuko dira. Deialdia idatziz bidaliko zaio kide bakoitzari bilerako eguna baino gutxienez hiru egun baliodun lehenago. Deialdian bilera premiazkoa dela adierazten bada, hiru eguneko epe hori laburtu ahal izango da.

Aurreko paragrafoan esandakoa gorabehera, batzordeko kide guztiak aurrean daudenean eta aho batez erabakitzen dutenean bilera egitea eta aztergaien zerrenda adosten dutenean, ez da beharrezkoa izango aurretik deialdia egitea eta Batzorde Eragilea balioz eratuko da edozein gai aztertzeko.

Bileretara kideak edo beren ordezkoak joango dira. Edozein kidek eman ahal izango dio beste kide bati bera ordezkatzeko eskuordetza, baina beti ere ekintza jakinetarako.

Batzordea balioz eratzeko beharrezkoa izango da kideen erdiak eta bat gehiago bertan egotea (batzordeko kide guztien kopurua bakoitia bada, quoruma izango da "erdia gehi bat" horren hurrengo zenbaki osoa; adibidez: zazpi badira, gutxienerako quoruma izateko bost beharko dira). Erabakiak hartuko dira bertaratuen (zuzenean edo ordezkarien bidez bertaratuen) aldeko botoen gehiengo soilaz.

20. artikulua. Batzorde Eragilearen eskumenak

Batzorde Eragilea fundazioaren organo ordezkoa da, Fundazioaren gobernu, ordezkaritza eta kudeaketarako eskumenak izan ahalko dituen Patronatuak berak horrela erabakiz gero; edozelan ere, ezin izango ditu izan Patronatuaren eskumen eskusibo eta etengabeak direnak.

21. artikulua. Zuzendari nagusia eta haren eskumenak

Zuzendari nagusia Batzorde Eragileak izendatuko du, lehendakariak proposatuta. Bileran dauden batzordekideen (zuzenean edo ordezkarien bidez bertaratuen) gehiengo osoaz hautatuko da.

Zuzendari nagusia ez da Batzorde Eragileko kide izango, baina Patronatuaren eta Batzorde Eragilearen bileretara joan ahal izango da; bileretan, hitza izango du, baina ez botorik.

Batzorde Eragileak atzera bota ahal izango du zuzendari nagusiaren izendapena, baldin eta bertaratutako batzordekideen (bertan dauden edo ordezkarien bidez bertaratutakoen) gehiengo osoak horren aldeko botoa ematen badu.

Zuzendari nagusiaren zereginak Batzorde Eragileak kasu bakoitzean ematen dizkionak izango dira. Batzordeak nahi dituen ahalmen guztiak eskuordetu ahal izango dizkio. Edozelan ere, behar besteko ahalmena izango du bere karguko zereginak betetzeko, hala nola: fundazioko organoen erabakiak eta jarraibideak kudeatu eta betetzea; fundazioaren helburuak hobeto betetzeko behar diren antolaketa lanak; eginkizunen programak prestatu eta proposatzea; pertsonalaren arloko politika kudeatzea; fundazioaren kontabilitatea eta finantzak antolatzea.

III. ATALA

ORDEZKO BATZORDEAK, A HOLKU BATZORDEAK ETA FUNDAZIOKO LANGILEAK


22. artikulua.- Ordezko batzordeak

Patronatuak edo Batzorde Eragileak ordezko batzorde bat edo gehiago eratu ahal izango dituzte, kasuan kasuko eskumenekin.

Ordezko batzordeak osatuko dituzte haiek eratu dituzten organoetako kideek.

Edozelan ere, ezin izango zaie eskuordetu kontuei eta aurrekontuari onespina emateko eskumena, ez eta ohiko kudeaketatik ateratzen diren ekintzak edo Babesletzaren baimena edo Babesletza jakitun jartzea eskatzen duten ekintzak.

23. artikulua: Aholku batzordeak



Patronatuak edo Batzorde Eragileak aholku batzordeak izendatu ahal izango dituzte, gai jakinei buruz iritzia eman eta balorazioak egiteko.

Aholku batzordeen ekintzak ez dira lotesleak izango fundazioko gobernu organoentzat.

Aholku batzordeetako kideak Patronatuak edo Batzorde Eragileak izendatuko dituzte, bere ustez fundazioaren helburuak betetzen lagun dezaketen pertsona edo entitateen artetik.

24. artikulua: Fundazioko langileak

Fundazioak bere xedeak betetzeko antolaera egokia izango du. Fundazioko langileak zuzendari nagusiaren menpe egongo dira. Batzorde Eragileak izendatuko ditu, bere ekimenez edo zuzendari nagusiak proposaturik, fundazioaren zereginak hobeto betetzeko beharrezkoak iruditzen zaizkion langileak.

Batzorde Eragileak, bere zuzendari nagusiaren bidez, gerentzia edo kudeaketa lanak edo fundazioaren izenean bestelako jarduerak egiteko eskumena eman ahal izango dizkie egoki deritzen pertsoneri, zeregin horien neurriko ordainsariarekin eta betiere legeek ezarritakoari jarraiki.

IV. ATALA

LANKIDE ATXIKIAREN FIGURA

25. artikulua: Lankide atxikiaren figura

Fundazioak lankide atxikiak eduki ahal izango ditu, hau da, beren jakituria, jardun, esperientzia edo ekarpenengatik fundazioaren helburuak betetzen lagun dezaketen pertsona fisiko eta juridikoak.

26. artikulua: Lankide atxiki bihurtzea

Fundazioaren lankide atxikiak izan nahi duten pertsona fisiko edo juridikoek horretarako eskaria egingo dute, baina Patronatuak onartzen dituenak baino ez dira lankide atxiki bihurtuko.

Patronatuak lankide atxikiarekiko hitzarmena egingo du, eta bertan zehaztuko du nolako konpromisoa hartu behar duen lankideak, eta zein baldintzatan, fundazioarekin.

27. artikulua: Lankide atxikia izateari uztea

Fundazioaren lankide atxikiek kasu hauetan utziko dute kargua:

- a) Patronatuak modu arrazoituan hala erabakitzen badu, lankideak ez betetzeagatik beraren eta fundazioaren arteko hitzarmenean zehaztutako konpromisoak, edo hitzarmenaren indarraldia amaitzeagatik.
- b) Kiebra edo likidazioagatik (pertsona juridikoen kasuan), heriotzagatik, ezintasunagatik edo ezgaitzeagatik (pertsona fisikoen kasuan).
- c) Legeetan jasotako beste edozein arrazoiengatik.

III. TITULUA

FUNDAZIOAREN ONDAREA

I. ATALA


KAPITALA ETA ONDAREA

28. artikulua: Fundazioaren ondarea

Hauek dira fundazioaren ondarea osatzen dutenak:

- a) Fundazioa eratzeko eskrituran ezarritako hornidura.
- b) Patronatua bere helburuak betetzeko fundazioari modu finkoan atxikitzen dizkion ondasun eta eskubideak.

Fundazioaren ondarea, une bakoitzean, bere ondasun guztiek eta ekonomikoki baloratu daitezkeen eskubide guztiek eratzen dute.



Fundazioak era guztietako ondasunak eduki ahal izango ditu. Ondasunak kudeatu eta erabiltzean horri dagozkion arauak beteko ditu eta fruituak eta errentak fundazioaren helburuetarako erabiliko ditu, betiere estatutu hauei men eginik.

29. artikulua: Baliabideak

Fundazioak baliabide hauek izango ditu:

- a) Estatuak, erakunde autonomiadunek, ente autonomiadunek, probintzia eta herri korporazioek eta bestelako pertsona juridiko eta fisikoek emandako diru laguntzak.
- b) Bere kapitalaren etekinak.
- c) Diru laguntzak, dohaintzak, herentziak eta legatuak.
- d) Fundazioak zerbitzu eta jardueren trukean jasotzen dituen zenbatekoak.
- e) Fundazioko kideen ekarpenak eta kuota ohikoak eta ezohikoak, eta Patronatuko kideek borondatez egiten dituzten ekarpenak eta ordaintzen dituzten kuotak, ohikoak eta ezohikoak.
- f) Fundazioak beste edozein kontzepturengatik jasotzen dituen gainerako sarrerak.

Urteko sarrerez gain, fundazioak patronoen urteko kuotak ere jaso ahal izango ditu. Zenbateko horiek fundazioaren jardueretarako erabiliko dira.

30. artikulua: Aldaketak ondarean

Fundazioaren kapitalak, balio nominala gorde arren, balio efektiborik edo eroste ahalmenik gal ez dezan, Patronatuak nahi duen moduan eta nahi beste aldiz aldatu, transformatu eta egokitu ahal izango du kapital hori, egoera ekonomiko bakoitzean komeni denaren arabera, alde aurretik Babesletza jakinaren gainean jarrita, nolabaiteko kostu bidezko zein dohainezko xedapen egintzei nola fundazioaren ondarea osatzen duten ondasun edo eskubideei dagokienean. Zehatz esateko, honako egintza hauek:

- a) Ondare zuzkidura osatu edo fundazioaren helburuen betetzeari zuzenean loturiko ondasun edo eskubideei dagozkienak.
- b) Fundazioaren ondarearen atal bati buruzko xedapen edo kargarik lekarketenak, salbu fundazioak onetsitako azken balantzean izandako aktiboaren % 20tik gora lihoakeena, baldin eta fundazioak kontu auditoria egin behar badu, eta % 40tik gora, auditoriarik egin behar ez badu.

31. artikulua: Fundazioaren ondarea zaintzea

Fundazioaren ondarea zaintzeko, honako arau hauek beteko dira:

- a) Fundazioaren ondarea osatzen duten ondasun eta eskubideak fundazioaren izenean egongo dira. Haren inbentarioan azaldu beharko dira eta, hala dagokionean, kasuan kasuko erregistroetan jasota.
- b) Ondasun higiezinak edota eskubide errealak fundazioaren izenean erregistratuko dira jabetza erregistroan. Inskribatu beharreko gainerako ondasunak dagozkien erregistroetan inskribatuko dira.
- c) Baloreak eta eskudirua, jabetza tituluak, gordailu ordezkagiriak, eta jabaria, jabetza, erabilera, gozamina edo fundazioak daukan beste edozein eskubide egiaztatzen duten dokumentuak gordeko dira Patronatuak fundazioaren izenean aukeratzen duen entitatean.
- d) Gainerako ondasun higigarriak Patronatuak erabakiko du nola zainduko diren.

Ondasun edo eskubide guztiok inbentarioen liburuan zehaztuko dira. Liburua Patronatuko idazkariak zainduko du eta berak bermatuko du liburuan jasotzen direla ondasunak identifikatu eta deskribatzeko xehetasun guztiak.

II. ATALA

EKONOMIA ETA KONTABILITATERAKO ARAUBIDEA

32. artikulua: Ekitaldi ekonomikoa


Ekitaldi ekonomikoa urtekoa izango da eta bat etorriko da urte naturalarekin, lehenengo ekitaldia izan ezik, hori fundazioa jardunean hasten denean hasiko baita.

Fundazioak aurrekontu arrunta egingo du ekitaldi ekonomiko bakoitzerako, eta hor gastuak eta sarrerak planifikatuko ditu, modu orekatuan.

Aurrekontua Babesletzaren aurrean aurkeztuko da onartua izan den urteko azken hiruhilekoan, eta, harekin batera, azalpen txostena.

33. artikulua: Ekonomia eta kontabilitate obligazioak

Patronatuak inbentarioa, egoeraren balantzea eta emaitzen kontua egingo ditu. Bertan islatuko du fundazioaren ondare, ekonomia eta finantza egoera, eta urtean zehar egindako jardueren eta ondarearen kudeaketa ekonomikoaren memoria, fundazioaren helburuak eta legeen aginduak



ezagutu eta bete egin dituela frogatzeko moduan. Era berean, aurreko urteko aurrekontuko sarrera eta gastuen kitapena egingo du, betiere legean ezarritakoari men eginez.

34. artikulua: Urteko kontuen aurkezpena, gordailua eta publikotasuna

Urteko kontuak onartu eta hurrengo 30 egun naturaleko epearen barruan, fundazioaren patronatuak Euskal Autonomia Erkidegoko Fundazioen Erregistrora bidaliko ditu urteko kontuak -behar bezala sinatuta- gordailutzeko, eta kontuek irabazi asmorik gabeko erakundeen kontabilitaterako indarrean dagoen araudia bete beharko dute.

Fundazioaren urteko kontuetan, gutxien dela, honakook sartzen dira: balantzea, emaitza-kontua, memoria eta aurreko jarduera planaren kitapena. Patronatuak, halaber, auditoretza txostena aurkeztuko du Euskal Autonomia Erkidegoko Fundazioei buruzko Legeak zehaztutako kasuetan.

Urteko kontuetan argi jaso behar dira fundazioaren ondare, finantza eta ekonomia egoera, urtean egindako jarduerak eta ondarearen gestio ekonomikoa, horien guztien bidez argi erakusteko eta egiaztatzeko fundazioaren helburuak eta lege xedapenak bete direla.

Ekonomia ekitaldia urtebetekoa izango da, eta urte naturala hartuko du.

Fundazioak, ekitaldi bakoitzerako, jarduera plan orekatu bat landuko du diru sarrerak eta gastuak zehaztuta. Plan hori Babesletzara bidaliko da onartua izan den ekitaldiko azken hiru hilabeteen barruan, eta planarekin batera plan hori justifikatzeko memoria.

III. ATALA

ERRENTAK FUNDAZIOAREN HELBURUETARA APLIKATZEKO ARAUAK

35. artikulua: Sarreraren erabilera eta administrazio gastuak

Fundazioak aldiro-aldiro bere helburua lortzeko jarduerak programatuko ditu. Horretarako, urtero prestazioak planifikatuko ditu erabakiko du eta nola egingo diren eta nori esleituko zaizkion.

Bere helburuen betetzera bideratuko dira, gutxien dela, edozein kontzepturengatik lortutako diru sarrera guztien % 70a, beroriek lortu eta hiru urtetara, hala balegokie, kengarri liratekeelarik diru sarrerei dagozkien zergak eta horien lortzeko egindako gastuak, fundazioaren helburuak betetzera bideraturikoak salbuetsita.

Kontutan hartu beharko da epea hasi egingo dela kasuan kasuko emaitzak eta diru sarrerak lortu direneko ekitaldiaren hasieran eta unean uneko ekitaldia itxi eta hurrengo hiru urteetara luzatzen dela.

Fundazioa eratzean edo gerora ondarerako dohaintza moduan jasotako ekarpenak betebeharrak horretatik kanpo geratuko dira.

Gainerako sarrerak fundazioaren hornidura handitzeko erabili beharko dira, behin administrazio gastuak kenduta, ezin izango dira zenbateko hauetatik gora joan: funts propioen % 5a edo urteko ekitaldiaren soberakinaren % 20a, salbu eta Babesletzak, fundazioak modu arrazoituan hala eskaturik, bestela jokatzeko baimen adierazia ematen badu, lege eta arauetan zehaztutakoa betez.

Fundazioa eratzean edo gerora ondarerako dohaintza moduan jasotako ekarpenak betebeharrak horretatik kanpo geratuko dira.


IV. TITULUA

ESTATUTUAK ALDATZEA. FUNDAZIOA DESEGITEA ETA HAREN ONDASUNEN KITAPENA EGITEA

36. artikulua. Estatutuak aldatzea eta fundazioa beste erakunde batzuekin batzea.

Fundazioaren Patronatuak erabaki ahal izango du estatutu hauek aldatzea, fundazioaren helburuak hobeto betetzeko egoki ikusten badu. Estatutu hauetako 15. artikuluari jarraiki, Estatutuak aldatzeko erabakia hartzeko, beharrezkoa izango da bertaratutako kideen (bertan dauden edo ordezkarien bidez bertaratutako) gehiengo osoak horren alde bozkatzea, eta, betiere, berezko patronoen (bertan dauden edo ordezkarien bidez bertaratutako) gehiengo soilak aldeko botoa ematea.

Era berean, Patronatuak erabaki ahal izango du fundazioa beste entitate batzuekin batzea, baldin eta fundazioaren helburua behar bezala beteko dela bermatuta badago. Beste entitate batzuekin batzeko erabakia arrazoitua izan behar da, eta beharrezkoa izango da bertaratutako



kideen (bertan dauden edo ordezkarien bidez bertaratutako) gehiengo osoak horren alde bozkatzea, eta, betiere, berezko patronoen (bertan dauden edo ordezkarien bidez bertaratutako) gehiengo soilak aldeko botoa ematea.

37. artikulua: Fundazioa desegitea

Fundazioa honako arrazoi hauengatik desegingo da:

- a) Eratu zenean finkatutako epea amaitzen denean.
- b) Eratu zenean finkatutako helburua erabat betetzen denean.
- c) Fundazioaren helburua betetzea ezinezkoa denean, lege honetan estatutuen aldaketari eta fundazioen bat-egiteari eta bereizketari buruz xedatutakoa gorabehera.
- d) Beste batekin bat egiteak ondorio hori dakarrenean.
- e) Eratzeko egintzan ezarritako beste edozein arrazoi gertatzen denean.
- f) Legeek aurreikusitako beste edozein arrazoi gertatzen denean

38. artikulua: Fundazioa desegiteko prozedura

Aurreko artikuluko a) idatzi zatian adierazitakoa gertatuz gero, fundazioa zuzenbide osoz desegingo da.

Aurreko artikuluko b), c) eta e) idatzi zatietan adierazitakoa gertatuz gero, fundazioa desegitea patronatuak erabaki beharko du eta babesletzak berretsi. Patronatuaren erabakirik ez badago edota haren erabakia babesletzak berresten ez badu, ebazpen judizial arrazoitua beharko da fundazioa desegiteko, patronatuak edota babesletzak eskatuta, kasuen arabera.

Aurreko artikuluko e) idatzi zatian adierazitakoa gertatuz gero, ebazpen judizial arrazoitua eskatuko da.

Fundazioa desegiteko erabakia arrazoitua izan beharko da, eta gutxien dela, patronatua osatzen duten kideen 2/3k eman beharko dute aldeko botoa.

Desegiteko erabakia edo, hala badagokio, ebazpen judiziala Euskal Autonomia Erkidegoko Fundazioen Erregistroan inskribatuko da.

39. artikulua: Kitapena

Fundazioaren kitapenetik sortzen diren ondasunak eta eskubideak, patronoek fundazioa eratzeko eskrituran azaldutako borondateari jarraiki, Patronatuak bideratuko dira erabakitzen dituen interes orokorreko helburuetara, eta hor lehentasuna izango du Euskal Herriko Unibertsitateak.

Patronatuak halakorik egi ezean, Babesletzak ondasun horiek emango dizkie desegindako fundazioaren antzeko helburuak dituzten fundazio edo erakundeei, eta, lehentasunez, Euskal Herrian egoitza dutenei.